

unnd unns als furstenn, die vonn angebornmer furstlicher gutikeit yrer getreuenn un-
 derthanen ere gedien gemach unnd gut wesenn zeu wißenn unnd zeu furdern geneigt
 sind, zeugesagt ist. Dorumb unnd dartzu sunderlich angeschenn redelichkeit der ob-
 gnantenn ratismeistere rethe unnd burgere zeu Freiberg gethanen bethe, auch irenn wil-
 ligenn getreuenn und dinstlichenn gehorsam, dorinn sich yre eldern vorfarn unnd sie 5
 bey unnsern eldern vorfordern seligenn und unns allezeit aufrichtig haben findenn
 laßenn, sie ire nachkomenn unnd erben gegen unns unnsern erben unnd nachkomen
 furdmer thun sullenn, so habenn wir in alle obgemelte ire privilegien hanffestenn und ver-
 schreibungen mit sampt allenn unnd iglichenn andern iren freiheidtenn rechten eren
 und gnadenn, die ire eldern vorfarn unnd sie bey unnsern liben eldern vorfordern unnd 10
 bruder seliger gedechnus unnd unns erworben lobelich gebraucht unnd herpracht ha-
 benn, vonn furstlicher macht fur unns unns erben und nachkomenn gnediglich er-
 nuwet bestetigt und confirmiret, ernuenn bestetigenn und confirmiren in die also gein-
 wertiglich in unnd mit crafft dießs brives, setzenn meynen unnd wullenn auch, das die
 in allen iren artickeln puncten stuckenn synnen meynungen und begreiffungen crefftig 15
 sein gehalten unnd volfurt werden sullen allernaßen unnd nicht mynner, dann als ab
 die vonn unns selbs außgangen ader vonn wortenn zeu wortten hinnen geschribenn
 weren, gantzlich an allerley argelist unnd geverde. Unnd habenn des zu warem ur-
 kunde unns gross majestadsigel fur unns unns erben und nachkomenn wißentlich
 an diesenn brieff thun henckenn. Hirbey sind gewest unnd gezeugen die hoch unnd 20
 wolgebornenn und edeln unser oheym heimlichenn rethe gevatter unnd liebenn ge-
 treuenn her Waldemar furst zeu Anhalt, her Heinrich grave zeu Swartzpurg herre zeu
 Arnsted unnd Sundershausenn, her Heinrich herre zeu Gera, Burghard Schenck herre
 zeu Tutemberg hofmeister zc., Johann Sifrid unns cantzler, Nithard Coder unns
 cammermeister unnd annder der unnsern gnug glaubwürdiger. Gebenn zeu Wymar nach 25
 Cristi unnsers liebenn herrenn geburt viertzehen hundert unnd im sechs unnd sechtzig-
 stenn jaren auff dornstag sanct Gallenn des heiligenn beichtigers tage.

346.

Meißen, 1467 Jan. 21.

Hilschr.: Hauptstaatsarchiv Dresden Cop. 58 fol. 344.

30

Anno domini zc. LX septimo quarta Agnetis *leihen Kurfürst Ernst und Herzog
 Albrecht dem Jacob Muschin, Bürger zu Freiberg, und seinen Erben* zewey teil eines
 stucks ackers bey dem Schonberge fur der stat Friberg gelegen. *Zeugen:* er Jurg
 von Slinitz, er Ditterich von Schonberg rittere, Hans Marschalg, Heinrich von Schon-
 berg zc. Actum Missen zc.

35